

Siunnersuummut nassuiaatit

Nassuiaatit nalinginnaasut**1. Aallaqqaasiut****1.1. Siunnersuummut pingaarnertut tunuliaqutaasut**

Naalakkersuisut kiisalu biskoppip palasinik, provstinik kiisalu domprovstinik atorfinitsitsinissamut aamma soraarsitsinissamut piginnaatitsissut Naalakkersuisuniit biskoppimut nuunneqarnissaa kissaatigisimavaat.

Atorfinitsitsisarnermik soraarsitsitsisarnermillu piginnaatitsissutip allanngortinneqarnerata malitsigisaanik atorfinitsitsineq soraarsitsinerlu pillugit aalajangiinissamut piginnaatitsissut allaffissornikkullu suliaasat naalakkersuisoqarfimmit akisussaasumit biskoppimut nuunneqarput.

Palaseqarfiup atuagarsuinut palasip allaffissornikkut aqutsinerata ilaa palaseqarfimmi sulisunut allanut tunniussisinnaaneranik pisariaqartitsisoqartoq aamma paasineqarsimavoq.

Palaseqarfiup atuagarsuanut palasip allattuisarnerata allamut suliakkiutiginera palasip suliassanik allanik suliaqarsinnaanerani kinguneqassaaq. Allaffissornermik suliallit suliamik isumaginnilertussanik piginnaanngorsarnissaannik pisariaqartitsisoqassaaq, tassa imaappoq palaseqarfiup atuagarsuanut allattuinermut pikkorissartinneqartariaqassapput. Biskoppip taamaammat aamma oqaluffimmi sulisunik ilinniartitseqqinnissaaq ingerlaqqiffiusumillu ilinniartitseqqinnissaaq pisariaqartissinnaavaa, assersuutigalugu palasimut ikiortit palaseqarfiup atuagarsuanut allattuinermik ilinniartinneqarnissaat.

2. Siunnersuummi immikkoortut pingaarnertit**2.1. Inatsit atuuttoq**

Inatsit atuuttut tassaapput, Ilageeqarnek pillugu Inatsisartut inatsisaanni nr. 9, 19. maj 2010-meersoq, Ilageeqarnek pillugu Inatsisartut inatsisaatigut nr. 2, 29. november 2013-meersutigut allanngortinneqartoq (Ilageeqarnermi atorfinitsitsisarnek, uppersarsaatit akiliuteqartarneq palasit ajoqillu upperisarsiornerup tungaatigut pissuteqartumik ilagiinni suliassanik suliaqarnissanut pisussaajunnaarsitaasarnerat, aalajangiinernik allaffissornermi ingerlatsisunut qulliunerusunut suliassanngortitseqqittarnernik killiliineq kiisalu allaffissornermi pinngitsoorani malittarisassiortarnissaaq pillugu aalajangersakkat) aamma Ilageeqarnek pillugu Inatsisartut inatsisaannik allanngortitsineq pillugu Inatsisartut inatsisaat nr. 27, 3. december 2018-meersoq (Ajoqinik aamma pattattunik ilinniartitaanernik aqqissuussinerit aamma nipangiussimasassanik ilisimatitseqatigiiffiusumik oqaaseqaatissanullu tunngasunik il. il. ataatsimiittarnerit).

Nalunaarutit eqqarsaatigalugit, nalunaarutit siunnersuummut attuumassutillit tulluuttuni aalajangersagaapput:

Palasinik atorfinitsitsinernut il.il. ilagiit sinniisaasa peqataatinneqartarnerat pillugu Namminersorlulik Oqartussat nalunaarutaat nr. 38, 18. januar 1999-imeersoq.

Ittoqqortoormiini palasit atorfup inuttalernissanut periusissaq pillugu Namminersorlulik Oqartussat nalunaarutaat nr. 15, 12. oktober 2017-imeersoq.

Atuagarsuarni allattuisarneq aamma atinik allannguinermi uppersaatillu ilaasa tunniunnerini akiliuteqartarnek pillugit Namminersorlulik Oqartussat nalunaarutaat nr. 17, 14. september 2015-imeersoq.

Palaseqarfiit agguataarneri pillugit Namminersorlulik Oqartussat nalunaarutaat nr. 2, 28. januar 2011-meersoq.

Naalakkersuisut biskoppillu akornanni akisussaaffiit suliaassallu agguarsimanerat
Naalakkersuisut Ilageeqarnermi pingaarnertut akisussaasuusut, taakkulu pillugit aalajangersagassanik biskoppi isumaqatiginiarlugu aalajangersagaliorsinnaanerit Ilageeqarneq pillugu Inatsisartut Inatsisaanni § 3, imm. 1-imi aalajangersagaavoq.

Ilageeqarneq pillugu Inatsisartut Inatsisaata § 6, imm. 1-imi aalajangersagaavoq, Kalaallit Nunaata biskoppeqarfiani biskoppip Ilageeqarnermi qitiusumik aqutsineq allaffissornerullu siulersornera isumagisarissagai biskoppeqarfimmilu provstinik, palasinik ajoqinik ilagiinnullu sinniisaasunik nakkutilliisuussasoq.

Naalakkersuisut biskoppillu akornanni suliaassat akisussaaffiillu agguarneqarnerat pillugu Ilageeqarneq pillugu inatsisitigut aalajangersagaqarnermi anguniagaavoq Naalakkersuisut biskoppillu akornanni erseqqissumik paasiuminartumillu suliaassat agguataarsimanissaat. Aamma tassani siunertaavortaaq ilagiinni tassanilu atorfilinni soqutigisalinnilu aalajangiisinnaatitaarpiarneq sunniuteqarnerlu biskoppimut tunniunneqassasut.

Naalakkersuisut taamaalillutik ilagiinnut tunngasunik inatsisiliornermik nassuiarnissaannillu suliaqassapput, aningaasanut inatsimmut naleqqiullugu pingaarnertigut missingersuutininik aqutsisuullutik aamma suliaasaqarfimmi nalinginnaasumik periusissiamik malittarisassanillu ilusilersuissallutik. Tamatuma peqatigisaanik biskoppip allaffissornermi suliaassat arlallit isumagissavai, tamatumani ilanngullugu palasit ilinniarteqqinneqartarnerat.

Ilageeqarneq pillugu inatsisip § 6, imm. 1-imi allassimavoq, Kalaallit Nunaanni Ilageeqarnikkut ingerlatsinikkut immikkoortortaarfik pilersinneqartoq, tassanilu biskoppi oqaluffeqarnerup ataani oqartussaasutut qullersatut inissisimalluni. Biskoppi taamaalilluni pisortat ingerlatsiviini oqartussanut kaajallaasitaliorsinnaalerlunilu ilitersuusiorsinnaalissaq

kiisalu sulianut kaajallaasitat ilitersuutillu naapertornagit ingerlanneqartunut uparuaasinnaalissalluni.

Biskoppip aalajangigai ilageeqarneq pillugu inatsimmi 28, imm. 3 naapertorlugu Naalakkersuisunut naammagittaalliutigineqarsinnaapput (nalinginnaasumik naalakkersuisoqarfimmut ilageeqarneq pillugu akisussaasumut). Aalajangiinerit upperisarsiornermuinnaq tunngassuteqartut taamaallaat misilinneqassapput inatsisitigut tunngavinnut attuumassuteqarpata.

Atorfinitsitsisinnaaneq soraarsitsisinnaanerlu

Ilageeqarneq pillugu Inatsisartut Inatsisaanni atuuttumi palasinik, provstinik kiisalu domprovstinik atorfinitsitsisinnaaneq soraarsitsisinnaanerlu Naalakkersuisut akisussaaffigigaat aalajangersagaavoq. Tamanna § 26 g-mi palasit pillugit aalajangersarneqarpoq, imatut allassimasunik:

"§ 26 g. Palasit atorfimmi kina atorfinitsinneqassanersoq Naalakkersuisut aalajangissavaat, tak. §§ 26 e aamma 26 f. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu."

Provstinik domprovstinillu atorfinitsitsineq pineqartillugu § 26 l, imm. 1-imi aalajangersarneqarpoq:

"§ 26 l. Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqarsimatinnagu."

Naalakkersuisut aalajangiisinnaatitaaneq pillugu Biskoppeqarfimmut allakkatigut 2015-imeersutigut, tamatumalu kingorna aalajangiisinnaatitaaneq pillugu allakkamut ilassutitigut, piginnaatitsissut Biskoppeqarfimmut tunniuppaat. Tassunga atatillugu uku aalajangiunneqarput.

Palasinik atorfinitsitsinermi biskoppimit uku isumagineqassasut:

- Atorfimmik inuttassarsiuussinissaq
- Atorfik inuttassarsiuunneqartoq pillugu allagarsiussamik nassiussinissaq kingornalu Aningaasaqarnermut Sulisoqarnermullu Aqutsisoqarfimmi akuerisassanngortinneqarnissaa, tassunga ilanngullugu atorfinitsitsinerni isumaqatigiissusiornissaq
- Qinnuteqaatinik kiisalu taakkununga tunngasunik uppersaatiniq tigooqqaaneq
- Ilagiit sinniisaannut attaveqarneq
- Atorfinitsitsinermi inatsisitigut suliassat pillugit Aningaasaqarnermut Sulisoqarnermullu Aqutsisoqarfimmut attaveqarnissaq
- Sulisunut inissiat pillugit inissiaatileqatigiiffimmut attaveqarnissaq

- Meeqqanik pinerliisimannginnermut uppersaammik piniarnissaq

Naalakkersuisoqarfimmit tulluuttut malinneqarsimanissaat qulakkeerneqassapput:

- Atorfik inuttassarsiuunneqartoq pillugu allagarsiussassap Aningaasaqarnermut Sulisoqarnermullu Aqutsisoqarfimmit akuerineqarsimanissaa
- Qinnuteqaatit ilanngussartallit
- Ilagiit sinniisaasa oqaaseqaataat
- Ilagiit sinniisaannik ataatsimeeqateqarnermi aalajangiiffigisanik allattuiffiit
- Biskoppip inassuteqaataa
- Ulloq biskoppip ilagiit sinniisaannik ataatsimeeqateqarnissaa pillugu ilisimatitsineq
- Qinnuteqartut sulisinnaangornissamut uppersaammik tunineqarsimanersut imaluunniit tunineqarsimannginnermut pillugit ilisimatitsineq

Tamatuma kingorna Naalakkersuisup aalajangissavaa kina palasit atorfinitinneqassanersoq.

Naalakkersuisoqarfik aalajangeereeruni itigartitaasut allakkatigut nalunaarfigissavai, atorfinitinneqarnissamik neqeroorfigineqartoq ilanngullugu.

Biskoppi tamanna pillugu ilisimatitsissaaq aamma biskoppip najoqqutassat suliassallu qinnuteqartup sulilernissanut pisariaqartut isumagissavai.

Atorfinititsineri suliassanik atorfinititsineri soraarsitsinermullu tunngassuteqanngitsunik isumaginninnissamut piginnaatitaaneq eqqarsaatigalugu inatsimmi § 6, imm. 1-imi allassimavoq, biskoppi provstinik, palasinik, ajoqinik ilagiinnullu sinniisunik nakkutilliissasoq.

Nakkutilliinermut ilaatigut ilaatinneqarput ilagiit nassuerutiginninnermi tunngaviannik, naalagiaritsisarnermut aqqissuussamik naalagiaritsinernilu ileqquusunik ataqqinninnermik biskoppip nakkutilliisarnissaa. Biskoppi aamma palasit palasit sulinerannik nakkutilliisarpog, nakkutilliinermilu biskoppi atorfimmut atatillugu unioqqutitsineri uparuaasinnaavoq kinguneqartitsisinnaallunilu, soraarsitsisinnaanili.

Palasinik, provstinik domprovstinillu atorfinititsineq pissaaq, palasit pineqartillugit §§ 26 e–26 i-mi allaaserineqartutut periuseq aalajangersimasog malillugu, provstit aamma domprovstit pineqartillugit §§ 26 j–26 l-imi allaaserineqartut malillugit.

Palasinik atorfinititsineri periuseq malillugu biskoppip imaluunniit provstip biskoppip piginnaatitaata ilagiit sinniisaanni ilaasortatut qinikkat akornanni qinnuteqarsimasunik ilisimatitsiffiusumik ataatsimeeqatigissavai. Tamatuma kingorna ilagiit sinniisaattut qinigaasimasut atorfinititsinissaaq pillugu oqaaseqaateqassapput. Oqaaseqaat taasiffissatut pingaarnersiorlugu tunniunneqassaaq, ilagiillu sinniisaat ajornanngippat peqataasut 3-t piukkunneqarlutik taaneqarnerpaasimasut pillugit nalunaaruteqassallutik.

Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq, qinnuteqaatillu ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassutissavai (nalinginnaasumik naalakkersuisoqarfimmut ilageeqarneq pillugu akisussaasumut).

Qinnuteqartoq biskoppip inassuteqaataanut ilaanngitsoq Naalakkersut atorfinitsikkusuppassuk, atorfinitsitsisoqartinnagu biskoppi oqaaseqarnissamut periarfissinneqassaaq.

Qinnuteqartoq ilagiit sinniisaasa oqaaseqaataannut ilanngunneqarsimanngitsoq Naalakkersuisut atorfinitsissinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq. Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.

Suliffeqarfinnut inunnulluunniit ilagiit sinniisaannik pilersitsiffiusimanngitsunut sullissinissaq siunertaralugu palasit atorfii tamakkiisumik ilaannakuusumilluunniit pilersinneqartut inuttalernissaanni Naalakkersuisut § 26 naapertorlugu periusissanut malittarisassanik aalajangersaasinnaapput. Tamanna aamma atuuppoq ukioq ataaseq angullugu sivikinnerusumik atorfinitsitsisoqassatillugu. Aalajangersakkamik tassannga Naalakkersuisut tunngaveqarlutik, Ittoqqortoormiini palasit atorfup inuttalernissaanut periusissaq pillugu Namminersorlutik Oqartussat nalunaarutaat nr. 15, 12. oktober 2017-imeersoq atuutsilerpaat. Maani aalajangersakkami malittarisassat Ittoqqortoormiini Palaseqarfimmi piffissami ilagiit sinniisaannik pilersitsiffiusimanngitsumi palasit atorfimmit inuttalersuinissamut atuupput.

Aamma Palasinik atorfinitsitsinernut il.il. ilagiit sinniisaasa peqataatinneqartarnerat pillugu Namminersornerullutik Oqartussat nalunaarutaanni nr. 38, 18. januar 1999-imeersumi suliffeqarfinnut inunnulluunniit ilagiit sinniisaannik pilersitsiffiusimanngitsunut sullissinissaq siunertaralugu palasit atorfii tamakkiisumik ilaannakuusumilluunniit pilersinneqartut inuttalerneqarnissaat pillugu aalajangersagaqarpoq, Danmarkimi Palaseqarfik ilanngullugu.

Annikitsunnguamik allannguilaarnikkut provstinik domprovstinillu atorfinitsitsisarnermi periusissatut malittarisassanik aamma aalajangersaasoqarpoq.

Ilageeqarnermi allanik atorfinitsitsinermi § 26 m, imm. 2-mi aalajangersagaavoq, biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, ajoqinik organistinillu atorfinitsitsinissamut soraarsitsinissamullu provstit piginnaatissinnaagai. § 26 m, imm. 3-mi aalajangersagaavoq, biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, oqaluffinni ikiortit, soorlu pedelit, eqqiaasut il.il., atorfinitsitsinissamut soraarsitsinissamullu provstit

piginnaatissinnaagai. § 26 m, imm. 4-mi aalajangersarneqarsimalluni, provsteqarfinni palaseqarfinnilu allaffinni allaffissornikkut sulisunik atorfinitsitsinissamut soraarsitsinissamullu provstit biskoppip piginnaatissinnaagai. Piginnaatitsissutitut aalajangersakkanut taakkununga biskoppip sulisunik taakkuninnga atorfinitsitsinnaanermut soraartitsisinnaanermullu piginnaatinneqarnera, § 6-itigut tunniunneqartoq tunngaviuvoq.

Palaseqarfinni atuagarsuarnut allattuisarneq

Ilageeqarneq pillugu Inatsisartut inatsisaata § 15-iani palaseqarfinni atuagarsuarmut allattuisarnissaq pillugu malittarisassat aalajangersagaapput, tassani allassimalluni:

” § 15. Palaseqarfinni arlalinnik palaseqarsimappat palasit kiffartortut ilaat ataaseq taakku akornannit palaseqarfinni atuagarsuarnik allattuisutut biskoppip toqqassavaa, ukiut sisamat tikillugit atasussatut.

Imm. 2. Palaseqarfinni palasi ataasiinnaatillugu, taassuma atuagarsuarnut allattuineq isumagissavaa.

Imm. 3. Palasip atuagarsuarnik allattuisup akisussaaffigaa palaseqarfinni allaffissorneq pingaartumillu atuagarsuit allattuiffigineqarnissaat, ilagiinni suliassat aaqqissuunneqarnerat, matumanittaaq naalagiarnert palasit akornanni agguataarnissaat, piareersimasut piffissalersornerisa aalajangersarneqarnerat aamma aningaasanik aqutsineq.

Imm. 4. Atuagarsuarnik allattuisarneq pillugu Naalakkersuisut biskopimut isumaqatigiinniareennikkut aalajangersakkanik aalajangersaasinnaapput.”

§ 15, imm. 1-imut pingaartumillu § 15, imm. 2-mut oqaasertaliussatigut paasineqarsinnaavoq, palasi palaseqarfiup atuagarsuarnut allattuisussaq allattuinnissamut akisussaaginnangitsoq, aammali suliassamik nammineerluni isumaginnittussaasoq. Tamatuma malitsigisaanik suliassap allamut tunniunneqarsinnaaneranut inatsisitigut erseqqissumik tunngavissaqartoqanngilaq.

Oqaluffinni atuagarsuit inuunermi qitiusutut pisut, soorlu inunngortoqarnera, kuisitsisoqarnera, atsiisoqarnera, apersortittoqarnera, katittoqarnera toqusoqarneralu pillugit oqaluttuarisaanermi nalunaarsuiffittut atuutiinnangillat. Kinguaariinnik misissuinissamut tunngavittut aalajangiisuulluinnarput, paasissutissanik ilaqutariit ataqatigiinnerannik takutitsisinnaasunik aamma kinguaariinni inuit ataasiakkaat pillugit paasissutissanik imaqtartamik. Kiisalu oqaluffinni atuagarsuit inatsisitigut pingaaruteqarput, pisortatigoortumik uppersaataagamik. Taamaammat oqaluffiit atuagarsuannut eqqortumik allattoqartarnissaa pingaaruteqarluinnarpoq.

Oqaluffinni atuagarsuarnut allattuisarneq nalunaarutip §§ 21-ani aamma 22-ani erseqqinnerusumik aalajangersagaavoq. Atuagarsuarni allattuisarneq aamma atinik allannguinnermi uppersaataillu ilaasa tunniunnerini akiliuteqartarneq pillugit Namminersorlutik Oqartussat nalunaarutaat nr. 17, 14. september 2015-imeersoq. Aalajangersakkat ima allassimapput:

” § 21. Ilagiit atuagarsuat palasimit ilagiit atuagarsuannik aqutsisumit nammineerluni aqunneqassaaq, taamaattoq tak. imm. 5.

Imm. 2. Paasissutissanik isumannaallisaavik palasimit sulisumit allamit, ajoqitut ilinniagalimmit imaluunniit inummit ilagiit atuagarsuannik ingerlatsinissamut pikkorissarsimasutut biskoppimit akuerisaasumit aqunneqassaaq, taamaattoq tak. imm. 3-5.

Imm. 3. Paasissutissanik isumannaallisaavik ajoqimit pikkorissarsimanani atuaasartumit biskoppip piginnaatitsinera malillugu ingerlanneqarsinnaavoq.

Imm. 4. § 26, imm. 1 naapertorlugu paasissutissanik isumannaallisaavik Nunatta Katersugaasivianut Allagaateqarfianullu tunniunneqarpat, pingaarnertut allattaavimmut ilanngussat pillugit nalunaarut malillugu paasissutissanik isumannaallisaavimmut ilanngussisoqassaaq.

Imm. 5. Biskoppi immikkut illuinnartunik pisoqartillugu allat, tigussaasumik nalinginnaasumilluunniit ilagiit atuagarsuannik ingerlatsinissaannut akuersisinnaavoq.

Imm. 6. Kialluunniit pisoq ataaseq pingaarnertut allattaavimmut paasissutissanillu isumannaallisaavimmut allattorsinnaanngilaa.”

§ 21, imm. 1-imi takuneqarsinnaasutut palaseqarfiup atuagarsua palasimit palaseqarfiup atuagarsuannik nammineerluni allattuisartumit isumagineqartarpoq. Tassani imm. 5-imi aalajangersagaavoq, biskoppip immikkut illuinnartunik pisoqartillugu allat, tigussaasumik nalinginnaasumilluunniit Ilagiit atuagarsuannik ingerlatsinissaannut akuersisinnaanera.

Nalunaarutip § 22, imm. 1-imi kina palaseqarfiup atuagarsuanut aamma pingaarnertut allattaavimmut paasissutissanillu isumannaallisaavimmut akisussaasuunersoq aalajangersagaavoq:

” § 22. Palasi ilagiit atuagarsuannik aqutsisuusoq palaseqarfimmi ilagiit atuagarsuannut akisussaasuvoq, tassunga ilanngullugu ilagiit atuagarsuannut tunngatillugu maleruaqqusassatut aalajangersakkat naapertorlugit peqqissaartumik ingerlanneqarnissaanut akisussaaneq.

Imm. 2. Ukiut tamaasa septemberip qaammataani palasi allattaavimmi pingaarnerni paasissutissanik pingaarnerni suliaqartup oqaloqatigiissutigisarpaa.

Imm. 3. Ukiut tamaasa kingusinnerpaamik ulloq 30. september palasip ilagiit allattaavissuannik aqutsisup provstimut nalunaarutigisarpaa oqaloqatigiinneq pisimasoq aamma iluarsissuteqarnissamut qanoq annertutigisumik tunngavissiiersoq.”

§ 22, imm. 1-imi takuneqarsinnaasutut, palasip oqaluffiup atuagarsuanik isumaginnittup oqaluffiup atuagarsuanut allattuisoqarsimanissaa aamma akisussaaffigivaa, aamma § 21, imm. 5 naapertorlugu suliaasaq allamut tunniunneqarsimagaluarpalluunniit.

Palasi oqaluffiup atuagarsuanut allattuisartuq tunngaviatigut isumaginninnissamut palaseqarfimmi atuagarsuarmut tunngatillugu akisussaasuvoq, tak. § 22. Palaseqarfiit

illoqarfinnut tamanut agguataarsimasuupput, tak. Palaseqarfiit agguataarneri pillugit Namminersorlutik Oqartussat nalunaarutaanni nr. 2, 28. januar 2011-meersumi § 1. Immikkut ittumik pisoqartillugu, tassa sumiiffiit kommunit agguataarneqarnerisa avataanniittut pineqartillugit domprovsti provstiluunniit, imaluunniit palasi palasilluunniit domprovstimit toqqarneqartut suliassamik isumaginnissapput.

” § 1. Illoqarfiit ataasiakkaarlutik nunaqarfii ilanngullugit tassaapput palaseqarfiit, taamaattorli tak. imm. 2.

Imm. 2. Ivittuut aamma Paamiut illoqarfii Paamiut palaseqarfianiipput.

§ 2. Kommunit agguataarnerisa avataaniittuni ilagiit pillugit suliassat, ilagiit atuagaasa allattortarneri, nalunaarusiortarnerit il.il. pillugit suliassat ilanngullugit, domprovstimit suliarineqartassapput, taamaattorli tak. imm. 2. Qeqqani Tunumilu Provsteqarfimmi palasit arlaat ataaseq amerlanerusulluunniit suliassanik tamanik ilaannaannilluunniit isumaginnittussatut Domprovstip toqqarsinnaavai.

Imm. 2. Pituffimmut ilageeqarnikkut suliassat, atuagarsualerinerit, nalunaarusiortarnerit il.il. pillugit suliassat ilanngullugit Avannaani provstip isumagissavai. Avannaani provsteqarfimmi palasit arlaat ataaseq amerlanerusulluunniit suliassanik tamanik ilaannaannilluunniit isumaginnittussatut Avannaani Provstip toqqarsinnaavai.”

2.2. Siunnersuutip imarisai

Atorfinitsitsisinnaaneq soraarsitsisinnaanerlu

Atorfinitsitsisinnaanermut soraarsitsisinnaanermullu piginnaatitaanerup biskoppimut nuunneqarnissanik siunnersuut imaqarpoq. Atorfinitsitsisinnaanermut soraarsitsisinnaanermullu piginnaatitsissutip nuunneqarneratigut suliaq allaffissornikkut ajornannginnerusumik sukkanerusumillu ingerlanneqartalissaaq. Peqatigitillugu atorfinitsitsisinnaanermut soraarsitsisinnaanermullu piginnaatitsissutip nuunneqarneratigut biskoppip Ilagiinni sulisut tamaasa tamakkiisumik akisussaaffigilissavai.

Palaseqarfimmi atuagarsuarnut allattuisarneq

Palasi palaseqarfimmi atuagarsuarnut allattuisussatut akisussaasoq kisimiilluni taakkununga akisussaaffeqassasoq siunnersuutikkut erseqqissaassutigineqarpoq, taamaattorli suliap taassuma allamut, suliamik piginnaasaqartumut, tunniunneqarsinnaaneranut akornutissaqarnani. Allanguineq suleriaatsimik atuutereersumik ingerlatitseqqiineq matumani pineqarpoq, assersuutigalugumi palaseqarfimmi palaseqanngitsumi suliassaq palasimit allamit suliarineqartarmat.

Peqatigisaanillu siunnersuuteqarnikkut Ilageeqarnermut inatsimmi kapitel 6-imi ilinniartitaanerit atuuffii siammarneqarput aamma palasit, ajoqitut pattattutullu atorfeqartuunngitsut sulisut allat pikkorissarsinnaaneri ilanngunneqarlutik. Allaffissornermi suliallit, soorlu palasip ikiortai, palaseqarfimmi atuagarsuarnik allattuisinnaanermut pikkorissartinneqarnissaannut tamatuma periarfississavai.

Oqaatsitigut naapertuutinngitsut

Kiisalu ilageeqarnermut inatsisip kalaallisuaa danskisuaalu imminnut arlalitsigut naapertuutinngitsut paasineqarsimavoq. Siunnersuutikkut taakku naqqissorneqassapput.

3. Pisortanut aningaasaqarnikkut allaffissornikkullu kingunerisassat

Siunnersuut pisortanut aningaasartuuteqarnerulernerannik kinguneqassanngitsut nalilerneqarpoq.

Palasinik, provstinik domprovstinillu atorfinitsitsinissamut piginnaatitsissut Naalakkersuisuniit biskoppimut nuunneqarnera, allaffissornikkut pitsaasumik sunniteqartussatut nalilerneqarpoq. Biskoppi qinnuteqaatinik tigooqqaasareerpoq aallarniutaasumillu qinnuteqaatinik nalilersuisareerluni, tamatumalu kingorna ilagiit sinniisaannik ataatsimeeqateqartareerluni, palasitut atorfimmu qinnuteqartut pillugit oqaaseqaateqartussanik. Tamatuma kingorna biskoppip palasitut atorfinitsinneqartussatut inassuteqaatini Naalakkersuisunut nassiutissavai, kina palasitut atorfinitsinneqassanersoq pillugu aalajangiisussanut. Atorfinitsitsinnaanermut soraarsitsisinnaanermullu piginnaatitsissutip Naalakkersuisuniit biskoppimut nuunneqarneratigut eqaannerusumik suliaqartoqartalissaaq.

Palasip oqaluffiup atuagarsuanut allattuisartup suliaasa ilaannik palaseqarfimmi allaffissornikkut sulisumut allamut tunniuneqarsinnaaneratigut palasi oqaluffiup atuagarsuarnut allattuisartoq suliaasaanik oqilisaaffigineqassaaq. Oqaluffiup atuagarsuarnut allattuisarnerup allaffissornikkut sulisooreersumut tunniunneqarsinnaavoq, taamaalilluni sulisussamik allamik atorfinitsitsinissaaq pisariaqartinneqassanngilaq.

4. Inuussutissarsiutinik ingerlataqartunut aningaasatigut allaffissornikkullu kingunerisassat

Siunnersuut aningaasaqarnikkut imaluunniit allaffissornikkut inuussutissarsiortunut kinguneqassanngitaneqanngilaq.

5. Avatangiisinut, pinngortitamut inuillu peqqissuunissaannut kingunerisassat

Siunnersuut avatangiisinut, pinngortitamut inuilluunniit peqqissusaannut kinguneqartussaannngitsutut nalilerneqarpoq.

6. Inuit pisinnaatitaaffii aamma innuttaasunut kingunerisassat

Siunnersuut inuit pisinnaatitaaffiit imaluunniit innuttaasunut kinguneqartussaannngitsutut nalilerneqarpoq.

7. Nunanut allanut tunngasunut sumiiffimmilu politikimut kingunerisassat kiisalu kinguneqaataasussat allat

Nunanut allanut attaveqaatinut imaluunniit nunap immikkoortuanut politikkimut tunngasunut kinguneqassanngilaq. Siunnersuut allanik pingaarutilitsigut kinguneqassanngilaq.

8. Oqartussaasut kattuffiillu il.il. tusarniaavigineqarneri

Siunnersuut piffissami 5. december 2025-miit 5. januar 2026-mut tusarniaanernut isaaffikkut pissarsiarineqarsinnaasimavoq, tusarniaanermullu peqataasunut nassiunneqarsimalluni, ilanngussaq 2 takuuk.

Aalajangersakkanut ataasiakkaanut Nassuiaatit

§ 1-imut

Nr. 1-imut

Aalajangersagaq imm. 1-imut atasutut isigineqassaaq, tassani imatut allassimasoqarpoq: “Palaseqarfimmi arlalinnik palaseqarsimappat palasit kiffartortut ilaat ataaseq taakku akornannit palaseqarfimmi atuagarsuarnik allattuisutut biskoppip toqqassavaa, ukiut sisamat tikillugit atasussatut.” Tassa takuneqarsinnaasutut palaseqarfimmi arlalinnik palaseqartillugu palasimik atuagarsuarnik allattuisussamik biskoppi toqqaassaaq. Palaseqarfik ataasiinnarmik palaseqarpat, palasi taanna oqaluffiup atuagarsuanik allattuisartussatut toqqarneqassaaq.

Nr. 2-mut

Palasi palaseqarfimmi atuagarsuarnut allattuisussatut akisussaasoq kisimiilluni taakkununga akisussaaffeqassasoq siunnersuutikkut erseqqissaassutigineqarpoq, taamaattorli suliap taassuma allamut, suliamik piginnaasaqartumut, tunniunneqarsinnaaneranut akornutissaqarnani. Palaseqarfimmi sulisoq alla, palasit, ajoqitut pattattutullu atorfeqartuunngitsut sulisut allat ilinniagaqaqqittarnerannik naammassinnissimasoq, oqaluffiup atuagarsuanik isumaginninnissamut piginnaatinneqalersinnaanngussaaq.

Nr. 3-mut

Biskoppip palasit, ajoqit pattattullu ilinniagaqaqqinnissaannik isumaginninnissamut pisussaaffii siammarlugit palasip ikiortaanut aamma atuutsinneqalerput. Taamaallilluni allaffissornikkut sulisut, soorlu palasit ikiortat anersaakkut suliaannik isumaginnissinnaanngitsut oqaluffiup atuagarsuinut allattuisinnaanermik pikkorissartinneqarsinnaalissapput. Palasip ikiortai, allaffissornermik suliaqarnissaannut atuagarsuarnik allattuinnissamut ilitersuunneqareernerme kingorna palasinut allaffissornikkut suliaannut ikuiussinnaalissapput.

Nr. 4-mut

Aalajangersakkami tunngavilerneqarpoq § 26 a, imm. 1, nr. 1-imiit 3-mut biskoppi atorfinitsitsinnissamut piumasaqaatini immikkut akuersisinnaasoq, kisiannili immikkut ittumik aatsaat pisoqarsimatillugu tunniunneqarsinnaalluni. Tamatumunnga pissutaavoq kikkulluunniit qanoq ilinniagaqarsimaneq apeqqutaatinnagu atorfimmu qinnuteqarnissamik pisinnaatitaammata. Tassani biskoppip akuersissutigisinnaavaa palasit atorfinitsitsineq.

Biskoppip immikkut akuersissuteqarsinnaanermut aalajangersagaq atussappagu qinnuteqartoq atorfinitsitsinnissamut piumasaqaatit § 26 a-miittut allat kiisalu sulilernissamut piumasaqaatit § 26 d-miittut naammassissallugit pisussaaffeqarpoq, ataani allassimasut takukkit.

Aalajangersagaq atorneqarsinnaassaaq, assersuutigalugu pineqartoq piginnaasanik palasit atorfimmik isumaginninnissami pingaaruteqarluartunik malunnartumik pigisaqarpat. Biskoppi

atorfinittussamut tunngatillugu suliamut attuumassutilimmik nalilersorluarnissaanut periarfissaqassaaq.

Nr. 5-imut

Taamaallaat aalajangersakkamut kalaallisut oqaasertaliussaq allanngortinneqarpoq, oqaatsip ”ivertinneqarsimassaaq” oqaatsitsigut naapertuutinngitsortaata iluarsineqarsimammat.

Kinaluunniit Kalaallit Nunaanni ilagiinni palasitut atorfinitsinneqartoq, atorfininnissamut piumasaqaatitut biskoppimit soraarummeersinneqarsimassaaq, tamatumunnga ritualit atuuttut naapertorlugit palasinngortinneqarsimassalluni, palasitut neriorsuisimassalluni biskoppillu uppersaasigaanik palasitut sulisinnaanngortitaasimassalluni.

Biskoppip suliassaraa atorfimmut pineqartumut qinnuteqartup/piukkunneqartup toqqagaasup piumasaqaatinik naammassinissimanersoq misissussallugu.

Biskoppimit soraarummeersinneqarsimaneq, palasitut sulisinnaanngortitaasimaneq, palasinngortinneqarneq ilagiinnullu palasitut neriorsuineq ataasiaannartumik pissaaq, biskoppilli uppersaasigaanik palasitut sulisinnaanngortitaaneq atorfinitsitsinerit tamaasa piumasarineqartussaalluni. Palasitut sulisinnaanngortitaaneq aqputigalugu ilagiinni atorfik biskoppip atorfini aqputigalugu sulilersussamut tunniutissavaa. Palasitut sulisinnaanngortitaaneq naalagiarluni palasinngortitsinerimi atuarneqassaaq.

Nr. 6-imut

Ilagiit sinniisai oqaaseqaammik suliaqareersimatillugit qinnuteqartup qinnuteqaatini tunuarterpugu nutaatut oqaaseqaasiorniarluni ataatsimiittoqassaaq. Tamatumani qinnuteqartunut taasinerit agguataarneqarnissaat qulakkeerniarneqarpoq. Siullertut oqaaseqaasiorniarluni ataatsimiinnermi taaneqarsimatinnani qinnuteqartup qinnuteqaatini tunuarterpugu, nutaatut oqaaseqaasiornissamut ataatsimiittoqassanngilaq, taasinerimmi tamarmik qinnuteqartumut/qinnuteqartunut allanut agguanneqarsimassammata.

Nr. 7-imut

§ 26 f, imm. 4 atorunnaarsinneqarpoq, palasimik atorfinitsitsisinnaanermut soraarsitsisinnaanermullu piginnaatitsissutip Naalakkersuisunit biskoppimut nuunneqarnerata kinguneranik.

Nr. 8-mut

Aalajangersakkami biskoppi kina palasitut atorfimmi atorfinitsinneqassanersoq aalajangissagaa aalajangiunneqarpoq. Atorfinitsitsisinnaanermut soraarsitsisinnaanermullu piginnaatitsissutip Naalakkersuisunit biskoppimut nuunneqarnera tunngavigalugu allannguisoqarpoq.

Nr. 9-mut

Imm. 1-imut

Aalajangersakkami ilagiit sinniisaat oqaaseqaammik tunniussisimatinnagit biskoppip qinnuteqartoq atorfinitsissinnaanngikkaa aalajangiunneqarpoq. Taamaalluni toqqaaniarnermi biskoppi aalajangeeqataasussat peqataanerannut pituttugaavoq, uani pisumi ilagiit sinniisaannut.

Imm. 2-mi takuneqarsinnaasutut, taasineri siullermi ilagiit sinnissaasa tamarmik qinnuteqartoq qinersimappassuk, pineqartoq atorfinitsinneqassaaq, qanorluunniit tulleriiaarisogalarpat.

Imm. 2-mut

Aalajangersagaq assersuutigalugu atorneqarsinnaavoq qinnuteqartut piukkunnaatillit ikippallaartut tiguneqarsimappata. Pisuni amerlanermi taamaalisogartillugu ilagiit sinniisaasa taasinerat aallartitsinnagu oqaaseqaammillu tunniussitinnagit, inuttassarsiuusseqqinnissaq isummerfigineqarsimasarpoq. Kisiannili imaassinnaavoq taasisogareernerani qinnuteqarsinnaasut amerlanerit kajungerilersinneqarsinnaanerisa misissorneqarnissaa pisariaqartoq. Inuttassarsiuinermi qinnuteqartoq ataasiinnaasimappat ilagiillu sinniisaasa ataatsimiinnermi taasimanngippassuk, tamatumani aamma atorfiup inuttassarsiuunneqarqinnissaa kingorna nalinginnaasuvoq.

Nr. 10-mut

Aalajangersakkami ilagiit sinniisai oqaaseqaammik suliaqareersimatillugit qinnuteqartup qinnuteqaatini tunuartippagu nutaatut oqaaseqaasiorniarluni ataatsimiittoqassasog aalajangersarneqarpoq. Tamatumani qinnuteqartunut taasinerit agguataarneqarnissaat qulakkeerneqassaaq. Qinnuteqartoq qinnuteqaammik tunuartitsisog ataatsimiinnermi siullermi taaneqarsimanngippat, oqaaseqaasiorniarluni ataatsimeeqqittoqassanngilaq. Tamatumunnga pissutaavoq, taasinerit tamarmik qinnuteqartumut agguataarneqarsimanissaat imaluunniit qinnuteqartut arlaqarsimappata, qinnuteqartunut agguataarneqarsimanissaat.

Nr. 11-mut

§ 26 k, imm. 4 atorunnaarsinneqarpoq, palasimik atorfinitsissinnaanermut soraarsitsissinnaanermullu piginnaatitsissutip Naalakkersuisunit biskoppimut nuunneqarnerata kinguneranik.

Nr. 12-imut

Palasinut atorfinitsissinnaanermut soraarsitsissinnaanermullu piginnaatitsissutip Naalakkersuisunit biskoppimut nuunneqarnera tunngavigalugu allannguisogarpoq. Aalajangersakkami biskoppip nammineerluni provstitut imaluunniit domprovstitut atorfimmut kina atorfinitsinneqassanersoq aalajangiiffigissagaa aalajangersarneqarpoq.

Nr. 13-imut

Aalajangersagaq aalajangersakkamik atuuttumik ilaatigut ingerlatitseqqiineruvoq. Taamaattorli atorfinitsitsisarnerup Naalakkersuisunit biskoppimut nuunneqarnerata kinguneranik allannguisoqarpoq, tak. § 26 g. Taamaammat oqaluffimmi kiisalu Kalaallit Nunaanni Ilagiit ataanni allaffimmi atorfinnik pilersitsinissamut atorunnaarsitsinissamulluunniit pisariaqartitsisoqarnerseq biskoppip nammineq nalilersussavaa.

§ 2-mut

Inatsisartut inatsisaata allannguutaa 1. januar 2027-mi atuutilernissaa siunnersuutigineqarpoq. Taamaalilluni piareersarluareerluni allannguutit atuutsinneqarsinnaalissapput. Aamma allaffissornikkut najoqqutassani pisariaqartinneqartumik allannguisoqarsinnaalissaaq, inatsisip allannguutaanut peqatigitillugu atuutsilerneqarsinnaasunik.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuutigineqartoq</i>
	§ 1 Ilageeqarnek pillugu Inatsisartut inatsisaat nr. 9, 19. maj 2010-meersoq, allanngortinneqartoq Inatsisartut inatsisaanni nr. 2, 29. november 2013-meersumi aamma Inatsisartut inatsisaanni nr. 27, 3. december 2018-meersumi allanngortinneqartumi, allannguutit makku ilanngunneqarpur:
§ 15, imm. 2 <i>Imm. 2. Palaseqarfimmi palasi ataasiinnaatillugu, taassuma atuagarsuarnut allattuineq isumagissavaa.</i>	1. § 15, imm. 2, ima oqaasertalerneqassaaq: " Imm. 2. Palaseqarfimmi palasi ataasiinnaatillugu, taassuma atuagarsuarnut allattuineq isumagissavaa."
§ 15, imm. 4 <i>Imm. 4. Atuagarsuarnik allattuisarneq pillugu Naalakkersuisut Biskopimut isumaqatigiinniareernikkut aalajangersakkanik aalajangersaasinnaapput.</i>	2. § 15, imm. 4-tut nutaatut ikkunneqassaaq: " Imm. 4. Palasip atuagarsuarnik allattuisup palaseqarfimmi suleqataasumut atorfeqartumut allamut, palaseqarfiup atuagarsuit suliassartaannik suliarinnaassusilimmu tunniussinnaavaa." Imm. 4 tamatuma kingorna imm. 5-inngussaaq.
§ 24. Biskoppip palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit isumagisarai. <i>Imm. 2. Naalakkersuisut palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit pillugit aalajangersakkanik, biskoppi isumaqatiginiareerlugu aalajangersaasinnaapput.</i>	3. § 24 ima oqaasertalerneqassaaq: " § 24. Biskoppip palasinik, ajoqinik pattattunillu aamma palasip ikiortaanik ilinniartitseqqinnerit ingerlaqqillunilu ilinniartitsinerit isumagissasarai. <i>Imm. 2. Naalakkersuisut palasinik, ajoqinik pattattunillu aamma palasip ikiortaanik ilinniartitseqqinnerit ingerlaqqillunilu ilinniartitsinerit pillugit aalajangersakkanik aalajangersaasinnaapput."</i>

§ 26 b. Naalakkersuisut biskoppip inassuteqareerneratigut inuk § 26 a, imm. 1-imi piunasaqaatinik naammassinnissimanngitsoq palasitutorfimmi atorfinitsinneqarnissaannut immikkut ittumik akuerisinnaavaat.	4. § 26 b ima oqaasertalerneqassaaq: “ § 26 b. § 26 a, imm. 1-imi piunasaqaataasunik naammassinnissimanngitsoq palasitutorfinitsinneqarnissaa biskoppip immikkut ittumik akuersissutigisinnaavaa.”
§ 26 d. Kinaluunniit Kalaallit Nunaanni ilagiinni palasitutorfinitsinneqartoq biskoppimit soraarummeersinneqarsimassaaq, ivertinneqarsimassaaq, ilagiinnut palasitutorneriorsuisimassaaq biskoppillu uppersarsaasigaanik palasitutorsulisinnaannngortitaasimassalluni.	5. § 26 d ima oqaasertalerneqassaaq: " § 26 d. Kinaluunniit Kalaallit Nunaanni ilagiinni palasitutorfinitsinneqartoq biskoppimit soraarummeersinneqarsimassaaq, palasinngortinneqarsimassaaq, ilagiinnut palasitutorneriorsuisimassaaq biskoppillu uppersarsaasigaanik palasitutorsulisinnaannngortitaasimassalluni.”
§ 26 f, imm. 2 <i>Imm. 2.</i> Ilagiit sinniisaasa oqaaseqaateqareerneranni, sulili biskoppi Naalakkersuisunut imm. 4 naapertorlugu inassuteqaateqanngitsoq qinnuteqartup qinnuteqaatini tunuartippagu, nutaamik oqaaseqaateqarnissamut ataatsimiinnermik ingerlatsisoqassaaq. Qinnuteqartoq qinnuteqaammik utertitsisoq oqaaseqaateqarnissamut ataatsimiinnermi siullermi taaneqarsimanngippat nutaamik oqaaseqaateqarniarluni ataatsimiinnermik ingerlatsisoqassanngilaq.	6. § 26 f, imm. 2 ima oqaasertalerneqassaaq: " <i>Imm. 2.</i> Ilagiit sinniisaasa oqaaseqaateqareernerisigut qinnuteqartup qinnuteqaatini tunuartippagu, nutaamik oqaaseqaateqarnissamut ataatsimiinnermik ingerlatsisoqassaaq. Qinnuteqartoq qinnuteqaammik tunuartitsisoq oqaaseqarnissamut ataatsimiinnermi siullermi taaneqarsimanngippat nutaamik oqaaseqaateqarniarluni ataatsimiinnermik ingerlatsisoqassanngilaq.”
§ 26 f, imm. 4 <i>Imm. 4.</i> Biskoppi sapinngisamik qinnuteqartunik pingasunik pingaarnersiorlugit tulleriaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassiatissavai.	7. § 26 f, imm. 4 atorunnaarpoq.
§ 26 g. Palasitutorforfimmi kina atorfinitsinneqassanersoq Naalakkersuisut aalajangissavaat, tak. §§ 26 e aamma 26 f. Qinnuteqartoq biskoppip inassuteqaataanut ilanngunneqanngitsoq	8. § 26 g ima oqaasertalerneqassaaq: " § 26 g. Biskoppip palasitutor kina atorfinitsinneqassanersoq aalajangissavaa, tak. §§ 26 e aamma 26 f.”

atorfinitsinneqarsinnaanngilaq biskoppi oqaaseqaateqarsimatinnagu.	
§ 26 h. Qinnuteqartoq ilagiit sinniisaasa oqaaseqaataannut ilanngunneqarsimanngitsoq Naalakkersuisut atorfinitssinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq. <i>Imm. 2.</i> Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.	9. § 26 h ima oqaasertalerneqassaaq: " § 26 h. Qinnuteqartoq ilagiit sinniisaasa oqaaseqaataannut ilanngunneqarsimanngitsoq biskoppip atorfinitssinnaanngilaa. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq atorfimmi atorfinitsinneqassaaq. <i>Imm. 2.</i> Immikkut ittumik pissutissaqartoqartoqarpat nutaamik inuttassarsiuisoqarnissaa biskoppip aalajangersinnaavaa. ”
§ 26 k, imm. 2 <i>Imm. 2.</i> Qinnuteqartup qinnuteqaatini utertippagu, ilagiit sinniisaasa oqaaseqaateqareerneranni aammalu biskoppi suli Naalakkersuisunut inassuteqaateqanngitsoq imm. 4 naapertorlugu, nutaamik oqaaseqaateqarnissamut ataatsimiinnermik ingerlatsisoqassaaq. Qinnuteqartoq qinnuteqaammik utertitsisoq oqaaseqaateqarnissamut ataatsimiinnermi siullermi taaneqarsimanngippat nutaamik oqaaseqaateqarniarluni ataatsimiinnermik ingerlatsisoqassanngilaq.	10. § 26 k, imm. 2 ima oqaasertalerneqassaaq: " <i>Imm. 2.</i> Ilagiit sinniisaasa oqaaseqaateqareernerisigut qinnuteqartup qinnuteqaatini tunuartippagu, nutaamik oqaaseqaateqarnissamut ataatsimiinnermik ingerlatsisoqassaaq. Qinnuteqartoq qinnuteqaammik tunuartitsisoq oqaaseqarnissamut ataatsimiinnermi siullermi taaneqarsimanngippat nutaamik oqaaseqaateqarniarluni ataatsimiinnermik ingerlatsisoqassanngilaq.”
§ 26 k, imm. 4 <i>Imm. 4.</i> Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit namminerlu inassuteqaanni ilanngullugu Naalakkersuisunut nassiutissavai.	11. § 26 k, imm. 4 atorunnaarpoq.
§ 26 l, imm. 1 Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq	12. § 26 l, imm. 1 ima oqaasertalerneqassaaq:

biskoppip inassuteqaataanut ilanngunneqanngitsoq atorfinitinneqarsinnaanngilaq biskoppi oqaaseqaateqarsimatinnagu.	" Biskoppip aalajangissavaa provstitut imaluunniit domprovstitut atorfimmuut kina atorfinitinneqassanersoq."
§ 26 m, imm. 1 Biskoppi Naalakkersuisut isumaqatiginiareerlugit Kalaallit Nunaanni Ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiissaaq.	13. § 26 m, imm. 1 ima oqaasertalerneqassaaq: ” Biskoppi Kalaallit Nunaanni Ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangiissaaq.”
	§ 2 Inatsisartut inatsisaat ulloq 1. januar 2027 atuutsinneqalissaaq.

Tusarniaanermut allakkiaq

Siunnersuut 5. december 2025-mit 5. januar 2026-mut ukununnga tusarniutigineqarsimavoq:

Biskop ilagiit@ilagiit.gl
Palaseqarfik Ittoqqortoormiit ittoqqortoormiut@ilagiit.gl
Palaseqarfik Ammassalik ammassalik@ilagiit.gl
Palaseqarfik Qaanaaq qaanaaq@ilagiit.gl
Palaseqarfik Upernavik upernavik@ilagiit.gl
Palaseqarfik Uummannaq uummannaq@ilagiit.gl
Palaseqarfik Qeqertarsuaq qeqertarsuaq@ilagiit.gl
Palaseqarfik Ilulissat ilulissat@ilagiit.gl
Palaseqarfik Qasigiannnguit qasigiannnguit@ilagiit.gl
Palaseqarfik Aasiaat aasiaat@ilagiit.gl
Palaseqarfik Kangaatsiaq kangaatsiaq@ilagiit.gl
Palaseqarfik Sisimiut sisimiut@ilagiit.gl
Palaseqarfik Maniitsoq maniitsoq@ilagiit.gl
Palaseqarfik Nuuk nuuk@ilagiit.gl
Palaseqarfik Paamiut paamiut@ilagiit.gl
Palaseqarfik Narsaq narsaq@ilagiit.gl
Palaseqarfik Qaqortoq qaqortoq@ilagiit.gl
Palaseqarfik Nanortalik nanortalik@ilagiit.gl

Avannaata Kommunia avannaata@avannaata.gl
Kommune Qeqertalik qeqertalik@qeqertalik.gl
Qeqqata Kommunia qeqqata@qeqqata.gl
Kommuneqarfik Sermersooq kommuneqarfik@sermersooq.gl
Kommune Kujalleq kommune@kujalleq.gl

Kalaallit Nunaanni Palasit Peqatigiiffiat (Nikoline Cortzen, nkce@ilagiit.gl)
Ilageeqarnermut Ministereqarfik km@km.dk
Atorfillit Kattuffiat ak@ak.gl
IMAK imak@imak.gl
SIK sik@sik.gl

Tusarniaanermut killiliussap naanerani tusarniaanermut akissuteqaatit marluk tiguneqarput.
Tusarniaanermi akissuteqaatit tulluuttuni issuarneqarput tusarniaanermut akissummut
naalakkersuisoqarfimmit oqaaseqaat ilanngullugu.

Palaseqarfik Nuuk allappoq:

Inatsimmik allannguissamik suliaqarnermi pingaarteqartoq Nuummi ilagiit sinniisaasa suliamut peqataatinneqarnissaat. Akisussaaffik biskoppimut tunniunneqassappat, ilagiit sinniisaasa kissaatigaat sulinermi peqataatinneqarnissartik, taamaalilluni aalajangiinerit ilagiit sinniisaat peqataatinnaq ingerlanneqassanatik

Naalakkersuisoqarfiup akisussaasup oqaaseqaatai:

Tassunga ilanngullugu oqaatigineqassaaq taamaammat ilagiit sinniisaat tusarniaanermi immikkut ilanngunneqarsimasut. Atorfinitsitsisarnermik soraarsitsitsisarnermillu piginnaatitsissutip allanngortinneqarnerata malitsigisaanik atorfinitsitsineq soraarsitsinerlu pillugit aalajangiinissamut piginnaatitsissut allaffissornikkullu suliasat naalakkersuisoqarfimmit akisussaasumit biskoppimut nuunneqarput. Allannguinerup siunertaraa aalajangiisartut kiisalu oqaluffimmi sulisunik atorfinitsitsinermut soraarsitsinermullu tunngasuni allaffissornikkut suliasat suliarineqarneranni eqaallisaanissaq. Tassunga ilanngunneqassaaq palasinik atorfinitsitsinermi ilagiit sinniisaasa suliasaat allannguuteqassanngimmata, tassa ilagiit sinniisaat maannakkutut biskoppimut oqaaseqaateqartassammata.

SIK allappoq:

Biskoppi atorfinitsitsinermut soraarsitsinermilu pisinnaatitaanerata ilaneqarnissaannut siunnersuummut SIK isumaqataavoq.

Naalakkersuisoqarfiup akisussaasup oqaaseqaatai:

Oqaaseqaat tusaatissatut tiguneqarpoq.